

雲笈七籤卷之四十六

攝六

秘要訣法 修真旨要

黃素內法第一

凡精誠密向純味玄真清齋苦志感慕神仙
忽自遇此三品之經而不師受者其人皆玄
會宿感列籍帝鄉真人密授應得此經其人
異提以標世功依太上黃素四四方聽得
隱盟玄誓神科也當以甲子之日清齋入室
夜半生氣之時眠坐任意臨目髮鬢叩齒二
十四通心拜四方畢而微祝曰
太上九靈三素元精仙都大神四極三清普
奉法化遇會上經玄師冥速靡覽真形乞山
隱盟誓以神明玉童侍衛玉華扶生八願九
合妙慧通靈願神願仙飛行上清祝畢又叩
齒二十四通嚙液十過心拜經前因此而寢
亦可起坐誦經必有吉感常能行之三年之
中得為經師成其真人大夫之任矣此是黃
素內法不煩復經管師及歃血之盟也真人
雖已受經亦常行之

八朝三元內禮隱法第二

凡為道士受三真品經雖一洞玄隱玄羽章
者當勤慕上契感會神明精心齋淨專道固
生孜孜不替味景玄清若此人者必獲上仙
依太上黃素四四方得行八朝三元內禮
隱法當以甲寅丙寅戊申庚申丁巳巳巳癸
亥乙亥之日平旦入室燒香左右臨目髮鬢
叩齒二十四通心拜四方微祝曰
太上太靈三素元精謹以吉日內朝真經神
童玉女散香虛庭使我神仙天地相傾祝畢
疾閉兩目使內外冥合不相聞見又叩齒三
七通嚙液三過開目都畢也此名為八朝三
元內禮隱法常能行之令人通靈徹視精應
三元真會妙感陟降太玄侍經玉女奏子求
生神仙不死天地相傾諸未受經者行之三
年得為經師靈瑞吉祥

內除罪籍第三

凡修受大洞真經雌一奇文者皆當別寢一
室不交人物常置經於枕格潔淨之處旦夕
燒香禮拜陳願人間內除罪籍常以月三日

七日二十一日侍經玉女乃奏人罪過於三
元與太一帝君共詳于之云為是其日也當
入室燒香叩齒三七通冥目微祝曰

太上神方大洞真經昔以有幸遭遇神明啓
蔭七圖受會三清若有陰罪帝君散靈二象
開明上帝合形令我飛仙神真長生祝畢又
叩齒二七通心拜四方開目都畢常當行之
者則二元密感帝君赦過諸有奏于之罪者
皆不見用也

三元隱謝解穢內法第四

凡道士存思上法及修學太一之事皆禁見
死尸血穢之物若兆見之者得聽三元隱謝
解穢內法當以朱砂一銖散內水中因以洗
目漱口并洗手足畢入室正寢交手上叩
齒二七通心拜四方乃微祝曰
三元上道太一護形司命公子五神黃寧血
尸散滅凶穢沈零七液灌注五藏華生令我
神仙長身利貞祝畢因疾閉兩目并氣自持
使內外冥合不相聞見良久覺身中小熱為
候竟又叩齒七下嚙液三過都畢誦此三元

隱謝解穢之內法也

大帝開結經法第五

凡道士修受上法欲有所看省誦讀經文發
篋之時皆當燒香左右心拜經前叩齒三通
乃微祝曰

玉帝上法上聞三清吉日齋戒敢開神經萬
試隱伏所向皆成玉童侍衛玉華散馨上告
三元與我長生祝畢開經然後乃得誦讀之
此名為大帝開經之法令玉女玉童侍守燒
香啓降神靈上聞九天

祝太一帝君法第六

凡道士受學洞經修行太一之事不得宣泄
太一帝君之名字以語於不同志之人泄則
犯太玄陰考兆三犯之者則五神廢宅不得
復為仙矣過三以徃死為下鬼已無仙冀
凡道士受經以後常晨夕存祝太一帝君之
名字先叩齒三通微祝曰
凌荒復昌七靈丈人太一務猷五神黃寧上
昇九天與帝共并乞願飛仙七祖胎嬰解愆
釋罪上登玉清畢又叩齒七通嚙液三過此

為存神釋罪請帝求仙也行之七年則神明
感會帝君喜歡玄母注生五神常存七祖罪
釋受胎南仙長生不死白日昇晨

慎忌法第七

凡修太一之事及行上法存神之道慎不可
見尸及血穢之物見一死尸則一年不得行
事又却傾一年之功然此帝一之科常却罰
於既往又進塞於將來若一年三見尸者則
罰功斷事各三年也若過見二十四尸者皆
不得復修太一求仙也

帝君捕神祝第八

凡道士獨宿山林而多為山精惡鬼所犯試
者當叩齒二七通閉氣祝曰
吾昨被帝君召攝領真元令我封掌此五嶽
權割鄧山山精萬靈受事俱會帝前七神所
引三元司真若有小妖即時棄殘山精澤尉
速來奉迎神師口命上聞三清一如大洞之
法不得稽停祝畢又叩齒三七通此為帝君
捕神祝伐山精百鬼法諸山神地祇房祠正
氣之神聞此之祝皆來執鞭奉迎神兵侍衛

若與萬人同宿矣

過邪大祝第九

大洞真經高上內章過邪大祝上法曰每當
經危險之路鬼廟之間意有疑難之處心有
微忌者乃當返舌內向嚙嚙液三過畢以左
手第二第三指捻兩鼻孔下人中之本鼻中
隔孔之內際也三十六過即手急按勿舉指
計數也鼻中隔之際名曰山源一名鬼井一
名神池一名邪根一名魂臺也捻畢因叩齒
七通畢又進手心以掩鼻於是臨目乃祝曰
朱鳥凌天神威內張山源四鎮鬼井逃亡神
池吐氣邪根伏藏魂臺四明瓊房玲琅玉真
魏義坐鎮明堂手揮紫霞頭建辰光執誅洞
經三十九章中有辟邪龍虎截嶽斬崗猛狩
奔牛嚼刀吞槍搗山獲天神崔毒龍六頭吐
火噴鬼之玉電積雷父掣星流橫某盜駭灼
逆風橫行天禽羅陣皆在我傍吐火萬丈以
除不祥群精啓道封落山卿千神百靈併首
叩願澤尉捧爐為我燒香所在所經萬神奉
迎畢又叩齒三通乃開目徐去左手按山源

則鬼并閉門手薄神他則邪根散發手臨魂
臺則真神守關於是感激靈根天獸來衛千
精震伏莫于我真此自然之理忽爾而然也
鼻下山源是我一身之靈津真邪之通府背
真者所以生邪氣為真者所以通萬邪在我
運攝之爾故吉凶兆焉

三天正法祝魔神第十

凡道士隱跡山林精思感靈或讀洞經發誓
之時多為北帝大魔來試敗兆每至昏夜當
叩齒三十六通畢乃呪曰

北帝大魔王受事帝君前泉曲之鬼四明靈
山千祇混形九首同身神虎放毒滅滅雷霆
神公吐呪所戮無親太微有命攝錄山川鳴
鈴交擲流煥九天風火征伐神鋒十陳兇試
伏滅萬精暴殘秋毒敢起受閉三關請依洞
法莫不如言呪畢又叩齒三十六通此名為
三天正法呪魔神方能行之則神兵侍衛
山川攝精千妖受閉萬試不干
思三台厭惡法第十一
上台虛箱中台六傳又作六傳下台由生

在三台內諱知者聚惡悉除諸善備至

凡於靜房端坐思三台覆頭次思兩腎氣從
胃中出與三台相連久久思畢二七咏齒二
鼻微微內氣閉口滿便嚙之嚙畢乃呪曰節
節榮榮願乞長生太玄三台常覆我形出入
行來萬神攝管步之五年仙骨自成步之七
年令藥皆精步之十年上昇天庭急急如律
令

步台日

正月三日

二月二日

五月五日

九月九日

十月二十六日法在本經

帝一燒香祝第十二

凡修行洞法及太一帝一之事者常至黃昏
時入室燒香心拜經前因叩齒二七通乃微
呪曰

太一帝尊帝一玄經五雲散景鬱徹三清玉
童玉女燒香侍靈上願開陳與我合形使我
神仙長享利貞呪畢又叩齒二七通此名為
帝一燒香開陳上願與靈合形之道也常能
爾者則玉華侍衛神靈輔真鬱散香雲上徹

九天將來三年則玉童玉女都見於子矣

魂胎受馨祝第十三

凡道士入室齋戒之時臨食當以左手持筋
珠料三過乃微呪曰

二宮上道四極清冷太一帝君百神黃寧受
禮三宮灌溉脾靈上饗太和餐味五馨魂胎
之命七液流傳百關通和五藏華明雙星合
景飛行上清食畢又咏齒三通此名為魂胎
受馨百神饗禮之道常能行之令人神明氣
和魂魄安寧群惡除試常保利津

理髮祝第十四

凡道士理髮及沐頭將散髮之時先咏齒七
通乃微呪曰

太帝散華玄歸大神今日吉日理髮沐塵辟
惡除病長生神仙呪畢乃髻髻竟叩齒一通
都畢此名為太帝散華理髮內法令人終年
不病耳目聰明頭腦不痛理髮常向本命既
櫛髮之始而陰呪曰

太帝散靈五老返神泥丸玄華保精長存左
拘隱月右引日根六合清鍊百神受恩畢行

之使人頭腦不痛太極錄華經曰理髮欲向土地既擲之始而微呪曰

況九玄華保精長存左為隱月右為日根六合清錄百神受恩畢嚙液三過能行之使髮不落而日主當數易擲之取多而不使痛亦可令侍者擲取多也於是血脈不滯髮根常堅

大帝隱祝第十五
凡道士入室燒香有所修願皆先啄齒三通乃微呪曰

玉華散景九炁含煙香雲靈羅徑衛九天侍香玉女上聞帝前令我長生世為神仙所向所願莫不如言祝畢心拜精念亦適意所陳矣此名大帝隱祝散香九天降靈寢室願會神仙也

厭惡夢呪第十六
若人夢寤不真魄協百氣以校其心欲伺我神之間伏也每遇惡夢但北向啓太上大道君具言其狀不過四五則自消絕也青童君口訣曰夜遇惡夢非好覺當即返

枕而呪曰
太靈玉女侍具衛魂六宮金童來守生門化惡返善上書三元使我長生乘景駕雲畢嚙液七過叩齒七通而更卧如此四五亦自都絕也此呪亦返惡夢而更吉祥也

揮神內呪第十七
凡道士行來獨宿山林廟座之間或有魔精惡鬼之地當先啄齒三十六通閉氣微呪曰

大帝陽元四羅幽闡千妖萬毒敢當吾前巨獸重吻刳腹屠肝神公使者守衛營番黃衣帥兵斬伐妖魂滅滅千魔摧落凶蟲絕種滅類取令梟殘玉帝上命清蕩三元呪畢又叩齒三十六通此名為大帝揮神內呪塞滅萬魔之法常能誦之則神兵見衛萬鬼受事千妖死伏

大帝寢神滅鬼除凶呪第十八
凡道士臨眠解衣之時先啄齒三通立而呪曰
受命太帝上昇九宮百神安位列侍神公魂魄和鍊五藏華蓋百醮玄注七液虛充火鈴

交喚滅鬼除凶上願神仙常生無窮呪畢又叩齒三通脫衣而卧此名為大帝寢神滅鬼除凶之法令人精明不病魂魄常存數有吉感

又滅鬼除惡呪第十九
本命之日及有心震之地閉關精思叩齒三通安氣呼吸正身北向而心存微祝曰

羅勒那朝方奈闕鍊班目勃隊憚漢巨蛇赫察白鼠丹利大魔真腹廣敷靈峙霄總攬吉凶發洞暢幽憐賜衆品領括繁條百方千塗莫不豁蒙天地齊度孰云能彫
除穢除兇七房祝法第二十
凡道士沐身及洗手之時先臨水啄齒三通乃微呪曰
四大開朗天地為常玄水滌穢辟除不祥雙皇守門七靈安房雲津鍊灌萬氣混康內外利真保茲黃裳呪畢又叩齒三通乃洗沐手面此名為滌穢除凶七房呪法常能行之者使人神明血淨解諸凶炁

除六天隱呪第二十一

凡道士夜行之時及有所畏恐震之地叩齒
二七道乃呪曰

吾是小有真王三天師君受太上神方殺
邪之文夜行遊尸七惡妖魂九鬼共賊千魔
成群赫栢圖兵巨獸羅千揮割萬妖當我者
殘龍烽七燭逐邪無間玉帝神呪揮劍東西
滅凶除邪萬鬼即懸三天正法皆如我言呪
畢又叩齒二七通此名為三天正法除六天
之隱呪也鬼有被此呪者皆自盲脚殘自然
死滅矣凡行來有恐之處但按如此不必須
夜行事也常能誦之則萬魔伏試十妖滅形。

太帝制魄伐尸神呪第二十二

凡道士祝滅三尸之法常以月晦朔之日及
甲寅庚寅庚申之日就身中七魄遊尸諸血
尸之鬼上天白人罪過自還中傷於身或遊
走他鄉召呼外鬼協進為妖賊是以惡夢交
於寢魂病膏纏於神室人所以惡夢疾病者
皆七魄遊尸之所為也至其日常當沐浴淨
服燒香入室精思懇懇不替他事以夜半生
炁時或黃昏時正寢東首接手上先叩齒

三七通乃微呪曰

七靈八神八願四陳上告靈命中皇變其錄
魄鍊魄塞賊邪精血鬼遊尸穢滯長浪利我
生關閉我死門若有真命聽對帝前使我長
生劫齡常存太帝之法敢告三元畢又叩齒
三七通嚙液十過都畢此名為太帝制魄伐
尸神呪之法也血尸七惡被此呪者皆得滅
於死尸之下魄明魄柔變化於三官之中辟
惡除病令人神明不死常能誦之則終身不
被驚昧凡存念上道呪除三尸之時常當採
取白芷草根及青木香合以東流水煮取其
汁以沐浴於身辟諸血尸惡氣亦常可和香
燒之以致神明若無青木香亦可單用白
芷九庚申甲寅之日是血鬼遊尸直合之日
也天炁交合七魄競亂淫穢混真邪津流換
明法動精七神離散每至其日當清齋別處
不雜他席慎不可與夫妻相見及同牀而寢
又不可爭競財色所行非道之方也每當燒
香感炁修行之時消呪之法亦可誦經混神
若思洞房帝一之事唯使精真以為意也

太帝群夢神呪第二十三

凡道士忽得不祥之夢或夢與人鬪爭或相
收錄者此亦七魄遊尸所為也或導持外鬼
來入本宅或三魂散騎五神戰劫或被東縛
不得來還故使惡夢非祥將有禍敗之漸也
卧覺之時即正寢上向接手上叩齒三七
通畢微呪曰

九天上帝四門八靈七房二玄三素元精太
一桃康上詣三清速告帝君攝命黃寧速召
七魄校實神庭若有不祥七尸鬼兵從呼雙
真流燭鍊形太微大神斬伐邪精三魂和柔
血尸沈零神歸絕宅觸向利貞使我神仙長
保劫齡呪畢又叩齒二七通嚙液十過此名
為太帝神呪辟夢除凶之法能行之者則三
魄和鍊七魄受制神明氣正尸穢散滅而向
所呪之鬼即已受考於地獄矣經三呪之後
自非靈感吉應不復夢於非常也

三元八節朝隱祝第二十四

凡道士禮願神明精思上法行諸隱呪之時
皆當燒香心拜密呪而已勿使得耳聞之也

若欲呪伐六天滅諸凶鬼者乃可小發聲耳亦不得絕大高響使傍人聞解之也若讀誦之時乃任意耳凡八節之日皆三天仙靈朝宴禮會之日也此修行禮願朝禮之時皆當齋用此日至於朔望朝禮非上法也凡是其

日欲行禮願陳祝之時當先叩齒七通心拜四方乃微祝曰

上清玉帝三素元君太上高靈仙都大神今日吉日八願開陳上願飛霄長生神仙中願天地合景風雲下願五藏與我長存次願七祖釋罪脫愆又願帝君斫伐胞根六願世世智慧開全七願滅鬼賊斬六天八願降靈徹聽東西上願一合莫不如言願神願仙上朝三元祝畢又拜如初亦適意所陳求解脫七祖之愆及首己之罪狀一續於行事之後也

此名為三元八節朝隱祝上願神仙之要法也行之三年七祖父母及己之罪都解釋矣然後玉華降衛感會神明八願開陳必獲靈仙之要契

雜法第二十五

凡行來畏恐常鳴天鍾於左齒三十六通先閉氣左嚙之叱叱五通常行之辟精邪惡物不祥之氣常夜寢臨欲眠時以手撫心叩齒三通閉目微呪曰

太靈九宮太一守房百神參位魂魄和同長生不死塞滅邪凶呪畢而寢此名為九宮隱呪寢魂之法常能行之使人魂魄安寧常保吉祥

凡傳授上法之時有經之師當先求感應然後傳之乃入室燒香密願神明即心拜經前微呪曰

太上元君仙都大神今日吉日八願開陳欲傳某上法敢告靈元未知可否須應乃宣祝畢使寢必獲靈應子自知其善否之心審可授之方也

凡經師授經之法先心拜四方以感神明為宗師之主餘乃執經起立仰天而祝告誓神靈以為玄科之約當說受經者之姓名并啓天神陳受經之品目為之科條名策告誓合巽文傳講而陳之祝畢弟子再拜跪受畢又

再拜此真人告神之盟內法不必盡存割血為敢漏之約也

凡經師傳授之時皆當依如上法清齋別處不交人事先啓告神明求請密感即乃傳之若真應橫錯所感非祥者此皆天靈顯報不使傳也若弟子不順神明違而傳之依黃素之科受子冥考七祖魂魄長閉地獄身亦將亡仙安所冀

凡存修太一之事欲有所禮願不可叩頭叩頭者則傾九天動千真神官迴覆泥丸倒懸天帝號於上府太一泣於中田教如此者則存念無益三真棄宮七神滯散玄宅納凶是為太上五神之至忌也故古之真人但心存叩頭運精感而行事不因頽頽以祈靈也凡修行太一之事真人道士不得有所禮拜

亦帝君五神之所忌也若有所精思行禮願之時但心拜而已不形屈也自不修受上法者不得同於外學之夫矣凡道士登齋入室忽有靈感妙應當有吉祥之夢皆道之欲成兆當勤修苦志感慕上會

如是不替則真靈玉女將懸子之寢矣卧覺

之時當正身上向叩齒三七通閉目微呪曰

上一赤子丹皇運珠太一帝尊凝天伯无七

靈上感五神歸遊靈童玉女露落雙符七星

同昇上登晨丘呪畢又叩齒三七通嚙液三

過閉目都畢此名為太一留神感會仙賢之

呪也如此者三年則九天諸神及太玄玉女

將降衛於兆身

凡道士入室齋戒有存修而數有不祥之物

及奇怪血光諸鬼精惡氣來恐試人者兆當

行此帝呪鬼殺邪神方先叩齒三十六通乃

呪之曰

二象迴傾玄一之旌七靈護命上詣三清雙

皇驅除赫栢羅兵三十萬人侍衛神營巨獸

百丈吐威攝精揮劍逐邪賊落魔靈神伯所

呪千妖滅形呪畢又叩齒三十六通此名為

此帝呪鬼殺邪神方諸神靈正氣聞此之呪

皆來奉衛於子而向不祥之氣得即死滅矣

雲笈七籤卷之四十六

雲笈七籤卷之四十七

攝七

秘要訣法

安魂魄呪

此法常經

紂絕標帝晨諒事構重阿炎如膏中煙救若

景耀華武城帶神鋒恬照吞青阿閭闔臨丹

井雲門營差我七非通奇蓋連宛亦敷魔六

天橫北道此是鬼神家急急如律令

著衣呪

旦起叩齒著衣呪曰

左青童玄靈右青童玉英冠帶我身輔祐我

形百邪奔散鬼賊摧精敢有犯我天地滅形

急急如律令

攝髮呪

凡欲攝髮先叩齒三通呪曰

上清朱雀不得動作勿離吾身勿受邪惡六

丁七星邪魔分形敢有當我此帝不侍急急

如律令畢閉目存想髮神蒼華字太元如嬰

兒之形在己髮上然後解攝之當令三五百

遍為佳然經中唯須一千五百遍畢成髮兩

手握固於膝上閉目微呪曰

泥九玄華保精長存左為隱月右為日根六

合清練百神受恩急急如律令

三洞奉道科曰凡梳頭先洗手而後梳之

皆不得使人見增壽八百二十

又凡梳頭髮及爪皆埋之勿投水火正爾拋

擲一則敬父母之遺體二則有鳥曰鵲鶴夜

入人家取其木髮則傷魄若能勤行增算六

百二十訖即入靖或殿堂朝禮便於寢卧之

處焚香左右叩齒二十四通存思如圖下床

躡履之際三稱大吉得所願微言言不可使

人聞却當存斗星在頭上斗合於頂指於前

聞和其心使虛靜恬然心動必思立功濟物

也

將卧之際焚香東西長跪叩齒三十六通誦

衛靈神呪曰

東方九氣青天明星大神煥照東方洞映九

門轉燭揚光掃穢除氛開明童子備衛我軒

收魔東妖上對帝君奉承正道亦書王文九

天符命攝龍驪傳普天安鎮我得飛仙